

四庫全書

子部

欽定四庫全書

名賢氏族言行類稿卷十一

宋 章定 撰

陳 二百三十一

姓纂嬌姓亦州名本太昊之墟畫八卦之所周武王  
封舜後胡公滿於陳後子孫以國為氏出潁川汝南  
下邳廣陵東海河南六望 河南官氏志侯莫陳氏  
改陳氏

孟子陳良楚產也悅周公仲尼之道學於中國北方之  
學者未能或之先也 陳良之徒陳相與其弟辛負  
来自宋之滕曰聞君行聖人之政願為聖人氓 陳  
代曰不見諸侯宜若小然今一見之大則以王小則  
以霸

荀子議兵陳鼯問孫卿曰先生議兵常以仁義為本仁  
者愛人義者循理然則又何以兵為

陳完字敬仲初懿氏卜妻於敬仲占之曰是謂鳳凰於

飛和鳴鏘鏘五世其昌並於正卿

史記陳勝字涉陽城人也與人庸耕輟耕之壟上悵恨久之曰苟富貴無相忘庸者笑而應之曰若為庸耕何富貴也涉太息曰嗟乎燕雀安知鴻鵠之志哉

前漢陳平陽武戶牖鄉人也為人長美色門外多長者車轍張負以女孫予之曰固有好美如陳平而長貧賤者乎里中社平為宰分肉甚均父老曰善陳孺子之為宰平曰使平得宰天下亦如是肉矣

六出奇計封曲逆侯孝惠時為左丞相 對文帝決  
獄及錢穀之間曰宰相者上佐天子理陰陽順四時  
不遂萬物之宜外鎮撫四夷諸侯內親附百姓使卿  
大夫各得任其職上稱善

陳餘大梁人也杖馬箠鞭下趙數十城所居國無不取  
卿相

陳萬年字幼公沛郡相人以高第入為右扶風遷太僕

廉平內行脩 後為御史大夫 事父母孝

丙吉  
傳

子咸字子康以父任為郎有異材抗直數言事遷為左曹 萬年病召咸教戒牀下語至夜半咸睡頭觸屏風萬年欲杖之謝曰具曉所言大要教咸調也

元帝擢為御史中丞公卿皆敬憚之 遷冀州刺史

徵為諫大夫復為南陽太守 咸三子少顯名於朝

廷

陳湯字子公山陽瑕丘人以薦為郎數求使外國遷西域副校尉 塞歙侯之旗斬郅支之首縣族萬國之

外揚威昆山之西 拜為射聲校尉 威震百蠻武  
暢四海漢元以來征伐方外之將未嘗有也

游俠陳遵字孟公杜陵人為京兆史 哀帝末著名字  
為後進冠 入公府日出醉歸曹事數廢 投轄畱  
賓 列侯有與同姓字者每至人門坐中莫不震動  
既至而非因號其人曰陳驚坐

後漢陳俊字子昭南陽人拜琅琊太守齊地素聞俊名  
入界盜賊皆解散

陳元字長孫以父欽任為郎 以才高著名辟司空府  
陳寵字昭公為廣漢太守更多姦貪訴訟日百數寵顯  
用良吏以為腹心訟者日減郡中清肅 為廷尉議  
疑獄每附經典務從恕濟活甚衆 子忠字伯始拜  
司隸校尉糾正中官外戚賓客近幸憚之

陳禪字紀山為漢中太守夷賊素聞其名聲即時降服  
拜遼東太守胡憚其威彊退還數百里

陳龜字叔珍家世邊將便習弓馬雄於北州 拜京兆



尹時三輔彊豪之族多侵枉小民龜到厲威嚴平理  
其怨屈者郡內大悅

陳寔字仲弓潁川人遷太丘長修德清淨百姓以安行  
部吏慮有訟者白欲禁之寔曰訟以求直禁之理將  
何申其勿有所拘 在鄉閭平心率物其有爭訟輒  
求判正至乃嘆曰寧為刑罰所加不為陳君所短

以盜為梁上君子譬之宜尅已反善遺絹三匹自是  
一縣無復盜竊 謚為文範先生 子紀謚 紀字

元方兄弟孝養閨門雖和後進之士皆推慕其風

遭父憂每哀至輒氣絕刺史嘉其至行表上尚書圖  
象百城以厲風俗拜大鴻臚子羣為司空天下以  
為公慚卿卿慚長以其名漸減也 諡字季方與紀  
齊德同行父子並著高名時號三君每宰府辟召常  
同時旌命羔鴈成羣當世靡不榮之

陳蕃字仲舉汝南人 大丈夫當掃除天下 有清世

之志 為樂安太守郡人周璆高潔之士唯蕃能致

特為置一榻去則縣之

為豫章太守性方峻不接

賓客士民亦畏其高

復為太傅太后詔曰蕃忠孝

之美德冠本朝蹇諤之操華首彌固

封高陽侯竟

不受封

陳重字景公與雷義為友俱學魯詩同舉孝廉俱在郎

署有同署郎負息錢數十萬責主詭求無已重密代

還郎後知厚辭謝之重曰非我之為將有同姓名者

終不言惠

與義俱拜尚書郎

陳翔字子麟少知名察孝廉高第拜侍御史

陳球字伯真舉孝廉遷繁陽令魏郡十五城獨繁陽有  
異政桂陽賊起以球為零陵太守球到設方畧朞月  
間賊虜消散後州兵反掾史白遣家避難球怒曰  
太守分國虎符受任一邦豈顧妻孥而沮國威乎卒  
破賊

魏志陳羣字長文祖父寔父紀叔謚皆有盛名號曰三  
君寔曰此兒必興吾宗魏初拜御史中丞在朝

無適無莫惟仗名義不以非道假人 後至司空

前後數密陳得失每上封事輒削其草時人及子弟

莫能知也 子泰字玄伯為并州刺史懷柔夷民甚

有威惠 宗邑貴人多寄寶貨因泰市奴婢皆挂之

於壁不發其封及徵為尚書悉以還之 後為征西

將軍都督雍涼轉左僕射

陳矯字季弼為魏郡太守時繫囚千數至有歷年矯悉

自覽罪狀一時論決 太祖崩策太子即位文帝曰

陳李弼臨大節明畧過人信一時之俊傑也遷尚書  
令至司徒 子本歷郡守九卿所在操綱領舉大體  
能使羣下自盡有統御吏之才不讀法律而得廷尉  
之稱

蜀志陳震字孝起遷尚書令 忠純之性老而益篤誠  
蜀臣之良矣

吳志陳武字子烈廬江人仁厚好施鄉里遠方客多依  
託之 累有功勞進位偏將軍 江表之虎臣也

晉書陳騫臨淮人累處方任為士庶所懷位極人臣因乞骸骨賜以几杖不朝以其勲舊耆老禮之甚重

子輿字顯初遷大司農侍中

陳頽字延思父訢立宅起門頽曰當使容馬車後州辟

部從事乘馬車還家宗黨榮之

頽言於晉元帝曰洛中康平之時朝士以

小心恭恪為風俗以偃蹇倨肆為優雅流風相染以至敗國今僚屬皆承西臺餘弊養望自高是前車已覆而後車又將尋之也

陳壽字承祚舉孝廉除著作郎撰三國志時人稱其善

叙事有良史之才

儒林陳邵字節良撰周禮評甚有條貫博通六籍耽悅  
典誥老而不倦宜在左右以篤儒教乃為給事中

藝術陳訓字道元天文筭歷陰陽占候無不畢綜尤善  
風角 拜諫議大夫

劉臻妻陳氏聰辯能屬文 嘗正旦獻椒花頌

載記陳元達字長宏元海僭號徵為黃門郎在位忠蹇  
屢進讜言退而削草雖子弟莫得而知



南史陳伯之勇冠三軍自梁入魏後擁衆八千復歸於梁為驍騎將軍

陳慶之字子雲為車騎大將軍攻魏麾下悉著白袍所向披靡先是洛中謠曰名軍大將莫自牢千兵萬馬避白袍子昕字君章為臨川太守昕弟暄文才俊逸梁後主時遷常侍

孝義陳遺以孫恩亂逃竄母泣涕失明遺還再拜號咽母豁然即明

孝義陳玄子四世同居一百七口詔表門閭蠲租稅

北史陳建代人孝文時為尚書右僕射

陳元康字長猷機敏有幹用神武遷為都官郎馬上

號令九十餘條元康屈指數盡能記憶神武曰此人

世間希有乃上天降佐也

陳欣字永怡在魏位大將軍仕周除熊州刺史總兵

境上三十餘載散財施惠得士衆心

陳孝意為魯郡司法書佐號為廉平丁父憂居喪過

禮有白鹿馴遶其廬時以為孝感

唐陳叔達字子聰陳宣帝子也隋時筦機祕方禪代時  
書策誥詔皆其筆也 武德初判納言嘗賜蒲萄不  
舉帝問之對曰臣母病渴求不能致願奉之 真觀  
初擢禮部尚書太宗謂曰武德內難卿有讜言故以  
此報叔達謝曰豈獨為陛下乃社稷計耳

陳子昂字伯玉梓州人十八未知書以富家子尚氣決  
弋博自如他日入鄉校感悔即痛修飭文明初舉進

士 武后奇其才召見金華殿占對慷慨擢麟臺正  
字 垂拱初詔問羣臣調元氣當以何道子昂上書  
勸后興明堂太學 后詔見賜筆札令條上利害子  
昂對三事 后謀開蜀山因以襲吐蕃子昂上書以  
亡驗諫止之 后召見復奏措刑等奏入科 唐興  
文章承徐庾餘風天下祖尚陳子昂始變邪正初為  
感遇詩三十八章王適曰是必為海內文宗乃請交  
子昂所論著當世以為法

陳元禮為郎將宿衛宮禁以淳篤自校後在清華宮正月望夜帝將出游諫曰宮外無備豫願歸城闕後

封蔡國公

陳夷行字周道由進士第擢起居郎史館修撰開成

二年進同平章事樂工尉遲璋授王府率右拾遺

竇洵直論奏鄭覃嗣復嫌以細故謂洵直邀君夷行

曰諫官當銜正須論宰相得失

陳京字慶復擢進士第德宗在奉天建言褒大節卹

賢臣天下所以安帝曰善帝以盧杞為饒州刺史京  
等劾之帝不聽京爭尤確杞遂廢

五代陳陶劔浦人幼業儒長結廬於南昌之西山以吟  
詠自適蔡寬夫詩話云陶詩數百篇間有佳語如中  
原不是無麟鳳自是皇家結網疎可憐無定河邊骨

猶是春閨夢裏人之類人多傳誦之

隱居詩話云李  
華吊古戰場文

其存其沒家莫聞知人或  
有言將信將疑  
娟娟心目寢寐見之陳陶襲其意而益工

宋朝陳洪進事見國史

陳恕字仲言洪州南昌人少折節讀書王明知洪州見而歎曰奇士也知代州人為鹽鐵使恕有心計釐去宿弊端太祖深器之曰真鹽鐵使也拜給事中參知政事子執中

陳堯叟字唐夫閬州人也父省華終左諫議大夫堯叟舉進士第一嘗為廣西運使以集驗方刻石柱州驛舍又植木道傍鑿井置亭舍至今為利右僕射知河陽卒堯叟有材用多智術久典機密軍馬之籍皆

記之事母馮氏孝謹 弟堯佐堯咨

陳堯佐字希元舉進士為開封府推官以言事切直貶  
通判潮州捕得鰐魚鳴鼓于市以文告而戮之嘗為  
河東運使河決滑州捲埽不能定堯佐用木龍殺水  
勢而隄成 後呂夷簡薦拜平章事 曾孫究嘗知  
潭州 汪藻銘其墓

陳堯咨字嘉謨舉進士第一知永興軍疏龍首渠入城  
民甚利之後為武信軍節度使



陳搏字圖南亳州真源人也始四五歲戲渦岸側有青  
衣媼抱置懷中乳之自是聰悟日益少時常舉進士  
不第遂不樂仕有大志隱武當山移居華山雲臺觀  
又止少華石室每寢處多百餘日不起嘗乘白驢欲  
入汴中塗聞我太祖登極大笑墜驢曰天下於是定  
矣太宗召以羽服見於延英殿甚禮重之宰相宋  
琪問曰先生脩養之道可以教人乎曰搏不知吐納  
脩養之理假令白日沖天何益於治方今天下博達

古今深究治亂真有道仁明之主正是君臣同德致  
理之時勤心脩鍊無出於此琪等稱歎士夫見之  
願聞善言荅曰優游之所勿久戀得志之處勿再往  
聞者以為至言太宗以其善相人也遣詣南牙見  
於真宗及門亟還問其故曰王門廝役皆將相也王  
可知矣賜號希夷先生端拱初卒經七日支體猶溫  
有五色雲蔽塞洞口彌月不散搏好讀書自號扶搖  
子真宗幸華陰謁其祠加禮焉

陳彭年字永年撫州南城人也舉進士至真宗時嘗知  
金州上䟽言置諫官等五事後為兵部侍郎卒 傳

聞強記明於典禮

陳從易字簡夫溫陵人也第進士歷彭州推官遷著佐  
除監察御史召對便殿賦瑞雪援筆立就焉真宗嘉  
歎面賜緋魚擢知虔州移廣州三年遠俗綏靖璽書  
褒美加三品服比還不市南物輦俸金過嶺上聞擢  
知制誥御飛白書清字以賜之其後除龍圖閣直學

士知杭州卒丞相蘓公頌從易甥也元豐中知滄州  
陛辭因語及家世神宗問曰卿母誰氏頌以從易對  
上曰天聖間侍從耶頌因言從易知廣州不蓄南物  
上聞曰清節過於馬援矣

陳執中字昭譽恕之子也 仁宗朝為相

陳升之字暘叔建之建陽人博學多能擢進士既而在  
言路最久臺諫官皆再為之以直道自任多所彈擊  
仁宗擢樞副後守藩至神宗即位遂知樞密院未幾

拜相緣母喪去位及服除又拜平章事足疾求罷以  
使相居于潤始為小官時與王安石相遇淮南安石  
即以大臣期之果先安石作相薨葬于潤子孫因家  
焉謚成肅秀國公其爵也

陳薦字彥升邢州沙河人舉進士嘗為諫議大夫韓琦  
常謂人曰廉於進而勇於退嫌疑間毫髮不處與人  
交久而不變如彥升者蓋無幾司馬亦服薦之質直  
云

陳烈字季慈福州侯官人也性介特篤於孝友年十四繼失怙恃水醬不入口者五日自壯迨老享奉如事生禮寢興晦朔未嘗輟甫冠力學不羣平居端嚴終日不言雖御僮僕如對大賓里有冠昏喪祭請而後行從學者數百人父兄有善訓其子弟者必舉烈言行以規之嘗與鄉薦黜于禮部不復踐場屋或免之仕則曰伊尹守道成湯三聘以幣呂望持誠文王載之俱歸今天子仁聖好賢有湯文之心豈無有先覺

如伊呂者乎 仁宗屢詔不起或問其故則曰吾學未成自公卿大臣至鄉老里民交章論薦志不少易嘉祐中以近臣薦授州學教授明年歐陽脩復薦其行除國子監直講久之致仕復起為郡教授烈不受廩祿弊衣糲食裕如也

陳襄字述古福州人也舉進士嘗為御史王安石為政屢言其害襄有學行與陳烈鄭穆周希孟友善閩人謂之四先生熙寧九年判太常寺兼侍講嘗薦司馬

光韓維呂公著蘇頌孫覺范純仁蘇軾蘇轍曾鞏劉  
摯張載程顥孔文仲鄭俠等三十三人紹興元年十  
一月十九日詔書曰近得陳襄薦章起草司馬光而  
下三十三人德行言語政事文學皆其所備斯為盛  
矣後世瞻之仰之以襄為何如人云云李綱伯紀序  
襄之文曰所著文章殆所謂有德之言而君子之文  
歟上為人主之所欽嚮下為士大夫之所宗師誦其  
詩讀其書可以想見其人劉執中作祠堂記亦曰其



政先於變俗其仁勤於濟衆故其出入中外裕裕然弗以進退榮辱動其心焉孫輝嘗知臨安輝之子騁慶元間持節湖廣徙四川總領所泣如柳子厚之謂袁高能使所居官大

陳瓘字瑩中南劍州人也舉進士甲科為湖州書記久之用蔡卞薦召為太學博士遷校書郎章惇蔡卞主紹述之論追貶司馬光上謗宣仁后他人不敢輒議瓘因對以謂今日以前既往之迹便為古事道常然

而不渝事有弊而必變故堯告舜舜告禹皆曰若稽古若者順而行之稽則考其當否或若或稽必使合於民情所以為帝王之治且論天子之孝與士大夫之孝不同哲宗因感悟徽宗即位除右正言論卞脩實錄增加王安石日錄紊亂神宗大典請改脩遷右司諫又極論蔡卞假託經義倡為紹述重誣我神考輕欺先帝倡為國是以行其私卞之所是謂之國是卞之所非論之流俗尊安石而薄我神考不

可為國是 罷監揚州糧料院改知無為軍事徽宗  
密遣人賜瓘黃金百兩 召還除著作郎遷右司員  
外郎又以書抵曾布論日錄以為尊私史而壓宗  
廟緣邊費而壞先政布怒罷知秦州尋主管沖佑觀  
除名編管袁州移廉州郴州監中獄廟坐其子正彙  
上書逮繫開封獄安置通州始瓘所辯日錄事著尊  
堯集議者以謂言多詆誣貶置台州移楚州居住以  
卒靖康元年贈右諫議大夫瓘篤學有識志不苟合

居喪孝初蔡卞知其才待之加禮璿不肖附麗恬於  
進取雖諸公文薦迨居言職所疏姦惡雖所舉不避  
也嘗曰彼則舉爾所知此則為仁由己識者重其言  
璿既力言京不可用用之必為腹心患悉如其言

瑩中嘗題歐公帖云敬其人愛其字使嘉祐以前見  
此書者皆如今日則朋黨之論何由而興東坡跋云  
美哉瑩中之言也仲尼之存或削其迹而夢奠之後  
復藏千載文忠公讀石守道文集詩有云後世苟不  
公至今無聖賢公沒二十餘年爾憎愛一變議論乃  
公亦何待後世乎東坡公之言尤其有味者故附見  
于此

陳祐字純益陵井監人舉進士元符間為正言司諫以直聲稱

陳師錫字伯脩建陽人舉進士徽宗用為殿中侍御

史與陳瓘論列蔡京之罪

陳洙師錫之羣從也嘗為殿院

未見傳

陳過庭字賓王越州山陰人舉進士嘗為右司使遼國在朝無所附倚徽宗嘗曰陳過庭中立不倚者也

陳靖字道卿莆田人也歷京西京東轉運使知蘓越建

泉等州好學頗通古今利害事宜在太宗與真宗朝  
多建言於農事為尤詳

陳師道字無已徐州彭城人也少刻苦問學以文謁曾  
鞏鞏奇之元祐中蘓軾傳堯俞孫覺薦于朝為徐州  
教授除太學博士初師道在官嘗私至南京謁蘓軾  
至是言者彈其冒法越境出為潁州教授紹聖初言  
者復論師道進非科第罷歸久之為棣州教授除祕  
書省正字以卒師道家素貧自罷歸彭城或累日不

炊妻子愠見不恤也諸經皆有訓傳於詩禮尤邃為  
文師曾鞏為詩宗黃庭堅然平淡雅興自成一家云  
陳睦賢良絳之孫王俊民榜第二人及第除監察御史  
元豐間高麗航海修貢之使屢至闕下上以其恭順  
欲遣使往諭歷選廷臣命宰臣喻旨激以忠義睦即  
受命自春奉使涉冬而還入見之日上宣諭曰卿奉  
命即行尤為可佳遂除起居舍人先是啣命出疆上  
遣中使賜以仙花金帶既畢使事即奏言本朝故事

惟寶文閣直學士以上職乃服金帶前以使事不敢  
辭今還朝願上所賜上特旨令服之其後錢勰楊景  
略援例欲服金帶神宗竟弗之許尋以直龍圖閣知  
潭州東坡以詩送之曰華清縹緲浮高棟上有纈林  
藏石甕後以寶文閣待制知廣州

陳侂賢良絳之孫章衡榜登第富弼守汝州辟為從事  
奏乞令考滿召試會弼歸執政即召除館閣校勘後  
侂出知陝州東坡以詩送之曰誰能如鐵牛橫身負



黃河滔天不能沒尺箠未易訶

云云

此外但一嘯後

生工揣摩

見東坡大全集

繼知湖州

陳次升字當時仙遊人登進士第尋改宣德郎召除監

察御史元豐八年選為江南西路按察歸除刑部

員外郎閱月為殿中侍御史初章惇蔡卞以次升神

廟所擢元祐間多持節在外未嘗顯用謂其必怨望

紹聖初特除御史欲其出力排元祐臣察以為已助

公首論勅榜反覆等事自此惇卞始不悅屢以事媒

藥之賴上知其朴忠嘗因陞對宣諭曰久不聞讜論  
會辭言職忤忤欲乘間出之擬優除職名河北轉運  
使上曰漕臣之職豈無其人陳某敢言不當去朝廷  
可除左司諫公益感激自奮徽宗即位除侍御史  
公對論三省大臣曰近肆為詭計但避專權之名而  
陛下每有差除陽為承行陰諭繳駁上以侵陵主道  
下以竊弄國權若不辦之於早則堅冰之患至矣又  
言朝廷之事宰相得以行之臺諫得以言之上下相維

所以存大公之道近來除授多出大臣不緣聖選切  
恐相為比周欲乞今後臺諫官若除授必出宸衷既  
而遷諫議大夫公又言惇久居權路迷國誤朝殘人  
害物屬陛下入承大統肆為異論及為山陵使先之  
幕次大昇舉陷於泥中惇既不能隨從又謂元祐皇  
后不從其請惇既不忠又欲置元祐皇后於有過惇  
遂謫知越州公以為謫之太輕再論謫昌化軍司戶  
雷州安置左丞蔡卞為臺諫所彈謫中大夫大平州

居住公言蔡卞備位政府陰肆奸謀凶焰日熾竊弄  
賞罰造作事端屢成冤獄編類章疏中傷士人其事  
主行雖章惇而卞實啓之時人目為笑面夜叉今又  
居善地何以懲姦卞移池州公又言京職為翰長委  
蛇經幄日侍清光可謂貴臣而乃卑躬屈已親昵閹  
官原其設心實欲令其伺陛下起居漏宮禁事於是  
京落端明殿學士提舉洞霄宮未幾京黨復熾其勢  
已成遂除公給事公當批駁力莫回天以寶文閣待

制出知潁昌自京竊國柄奸言日至降充集賢殿修  
撰左司諫吳材正言王能甫尚肆醜詆以次升元祐  
姦臣擅欲紛更先帝約束落集賢殿修撰知萊州續  
降官濠州居住又移臨江軍又坐乞畱陳瓘湔洗  
鄒浩連累臣僚除名建昌居住復編管循州崇寧四  
年八月御筆次第量移遷謫臣僚路移荆湖南北路  
五年星文變見上慨然悔悟特加英斷元祐元符末  
係籍人等朝堂石刻奸黨石刻併令除毀復公朝奉

大夫提舉亳州明道宮繼復寶文閣待制終于真州之私第遇事敢言雖鼎鑊刀鋸在前曾莫之卹當哲宗親政之初惇卞欲誣宣仁皇后有廢立之意時方奏事畢輒前曰臣聞朝廷欲於宣仁有所貶削是乎宣仁保佑聖躬九年功德巍巍四海歸心升遐之日如喪考妣若以姦人疵毀輒有議論不惟有虧聖孝且恐失人心矣哲宗俛首曰無之公曰臣敢為陛下賀上曰卿何從得此次升曰臣以言為職苟有所

聞當以忠告陛下不當詰臣所從來時呂升卿為廣南按察公奏曰陛下初將欲全元祐臣僚今乃欲殺之何耶上曰無殺之意公曰呂升卿為廣南按察升卿乃惠卿之弟元祐中負罪恐外臺按察嘗致仕家居太皇太后上升自真州泛小舟隱姓名不七日至京師投匭上書其人資性慘刻善求人過失今將使指放元祐臣僚遷謫之地理無全者於是罷升卿廣南按察元城劉公曰當時有功臣元祐人為多

見莆田人物志

陳繹未見傳葛常之韻語陽秋云繹奉親至孝嘗作慶老堂以娛其母王介甫贈之詩云種竹嘗疑出冬筍開池故合涌寒泉

陳軒字元輿建之建陽人嘉祐中廷試名冠多士有司以其賦用韻失次欲黜之有中旨降第二先是進士賜袍笏例於廷下脫白服緣軒衣如懸鶉馬上惻然解黃衣賜之至今賜袍笏有淡黃衫自軒始初調平江軍節度推官後知汀州元祐初除祠部郎中黃庭



堅贈之詩有曰平生所聞陳汀州蝗不入境年屢豐  
其稱賞如此自右史擢中書舍人出守廬州除待制  
移杭江寧陳頴昌四郡及徽宗即位召為兵侍上言  
散青苗以濟艱乏其俵散官不當立賞格尋以龍圖  
閣直學士帥成都徙長安乞鄉郡知福州卒

陳覺民字達野仙遊柘山人登進士第元祐間東坡知  
杭州舉應制科歷知建州泉州福建運判提刑改廣  
東提刑知廣州所至有風力兩為鄉部使者凡過郡

邑非公事未嘗與僚屬妄交一談人甚憚之 嘗過

武夷題詩云昇真洞口接天門靈草丹桃日日春聽

說列仙來瑞世三朝德業在斯民

章聖誕自武夷事見楊大年家集神

考與哲廟亦皆武夷真君應世故有三朝德業之句

武夷真君應世之異士夫

鮮有知之者定故表而出之

陳與義字去非西洛人河目海口大耳聳峙識者知其

為貴人也政和中以上舍釋褐宣和中擢館職符寶

郎坐王黼罷相例出建炎中召為臺郎遷左史除中

書舍人歷吏禮二部侍郎除直學士知湖州復召為  
西掖遷內相旋參大政以資政殿學士奉祠僑寓烏  
墩壽不及中詩人多恨之有簡齋集十卷葛勝仲為  
集引 徽宗見所賦墨梅詩善之亟命召對有見晚  
之歎 其薦士於朝退未嘗以語人士以是多之  
王明清謂陳去非出處氣節翰墨文章為中興大臣  
之冠乃陳公弼之孫東坡先生曾為陳季常作公弼  
傳

陳古老與子希造仙遊人何絃編莆陽人物志以之入節義門諸孫光祖今守英德振祖人物甚儒雅

陳俊卿字應求莆田之白湖人紹興戊午以亞魁登第汪澈薦為監察御史陞副端除兵侍遷中書舍人為江淮宣撫判官兼知建康府召還除吏侍嘗論人才當以氣節為主祖宗盛時涵養作成者為蔡京秦檜摧喪殆盡臣願陛下深以為念又論本朝家法外戚不預政最有深意上首肯久之繼除樞參首薦林栗

劉朔等恬退有守可為侍從臺諫之儲未幾拜相以  
用人為己任抑奔競獎廉退每接朝士及牧守來自  
遠方者必問以時政得失人才賢否見給舍必免之  
曰朝廷政令安得每事盡善主上從諫如流公等勿  
憚舉職後以大觀文兩知福州尋判建康且詔赴  
闕奏事既對為上顧遇極一時之榮後告老以少傅  
福國公歸第薨謚正獻四子實守宓宿守嘗任大  
監將漕荆湖庠塾址坦皆其諸孫也

陳知柔字體仁溫陵人也舉進士第嘗知循州賀州初  
知柔與秦熺為同年進士一時前列十餘人皆扳援  
鼎貴知柔不少貶以故齟齬不合雅好山水方盛年  
從仕已動歸休之興自號休齋居士在天台奉安輿  
徧游名山歸至會稽愛巖壑之秀畱止二年罷賀州  
歸畱惠陽三年暇日泛豐湖登白鶴峯追和東坡詩  
陶寫羅浮風物殆盡凡四奉祠諸生受業戶屢常滿  
姪樸模皆登第樸開禧間任大卿出帥東廣模亦

召試入館

陳仕楚字英仲莆田人早有聲場屋從艾軒游登壬辰  
第調臨江戶曹待次授徒為業鳴道於仙遊及漳南  
文風翕變所入悉為昆弟畢昏嫁無毫髮畱邦人記  
之改秩調福州侯官縣歸中塗周益公當國薦之以  
國子監簿召孝宗獎其誠實尋差樞密院編修官  
除丞宗正兼禮郎兼嘉王府直請一日百官已趣班  
雪大作宰相立索表稱賀授筆立成朝士皆稱嘆除

軍器少監出提舉江南東路常平茶鹽公事時歲儉民艱食公不憚巡行訪疾苦全活者衆有舊為中執法及治藩聲減公首按懲之一道肅然可謂仁者之勇平時隆篤友于周卹之誼至是益行志後除右史駸駸登用慶元改元除侍講忽以疾終上深惜之

陳居仁字安行其先莆田令邁唐武德中秩滿居莆司直嶠其裔也父膏仕至侍御史再娶四明汪氏遂家焉居仁登進士第歷信州鉛山尉諸王宮教授國子



監丞祕書丞兼禮部郎外補徽州入奏畱為戶部郎  
兼行度支又兼禮部踰年除樞密檢詳諸方文字歷  
左右司郎中檢正中書門下省諸房公事公椽東西  
府最久釐正綱紀平反滯獄皆表表有成績假吏部  
尚書賀金國生辰使回除起居郎真拜中書舍人丁  
母憂從吉除集英殿修撰知鄂州鄂之民居多並江  
歲有水患公為築堤名萬金後水至不為蓄治最拜  
煥章閣待制移知建寧鎮江旱饑輟公以治公講究

荒政務實惠及民全活不可勝計至今言賑濟者以  
公京口之政為講首加寶文閣待制知福州詔詣行  
在所未至屬疾除華文閣直學士奉祠卒子四人輩  
芾卓阜卓復繼世科文章行業有稱於當時  
公斥俸入之餘置義莊以給族黨之貧者推其官及  
孤甥從子人以為難少傅周益公銘其墓曰士大  
夫行誼著于家文章顯于朝豈弟布于郡國有一焉  
足為名臣况兼是三者乎

陳驥仙遊畱坡人也元符間登進士第歷宗子博士子  
豐字某博學有文章名最高先以父任歷福建戶曹  
尋擢第入朝為刪定累遷太學國子博士出知惠南  
恩二州子讜字正仲木榜登科開禧間為侍從出守  
宣城以寶謨閣待制奉祠歸第

秦

二百三十二

姓纂顓頊嬴姓之後伯益裔孫非子周孝王封之於  
秦隴西秦亭是也至始皇滅六國子嬰降漢子孫以

國為氏又魯有秦董父生丕茲又秦祖秦冉秦商秦  
非並仲尼弟子

左傳襄公十年晉伐偃陽孟氏之臣秦董父輦重如役師  
歸孟獻子以秦董父為右生丕茲事仲尼

襄公十八年魏絳克郤趙武韓起圍盧十二月及秦周  
伐雍門之萩

後漢循吏秦彭字伯平扶風人與羣從同時為二千石  
者五人三輔號曰萬石秦氏遷山陽太守百姓懷

愛莫有欺犯姦吏跼蹐無所容詐 轉潁川太守仍  
有鳳凰麒麟嘉禾甘露之瑞集其郡境

蜀志秦宓字子勅始慕肥遯之高曝背隴畝之間誦顏  
子之簞瓢詠原憲之蓬戶 後為益州別駕遷大司

農

晉書秦秀字玄良少以忠直知名 為博士

南史孝義秦綿母喪送葬不忍復還鄉人為作茅庵仍

止其中

北史孝行秦族祖白父翟並有至性聞於鄉里 族性  
至孝事親竭力父母喪哀毀過禮有詔表其門閭

唐秦瓊字叔寶以字顯齊州歷城人始為隋將來護兒  
帳內母喪護兒遣使襚吊之吏怪曰將軍未有所問  
而獨吊之何也護兒曰是子才而武豈久處貧賤邪  
後降高祖拜馬軍總管破尉遲敬德功多帝賜以黃金  
瓶勞曰卿不恤妻子而來歸我且又立功使朕肉  
可食當刈以啖爾況子女玉帛乎 從討世充等三

盜未嘗不身先鋒鏖所積賜以千萬計封翼國公

每敵有驍將銳士震耀者秦王輒命往取之躍馬挺槍刺於萬衆中莫不如志以是頗自負 後疾嘗曰

吾少長戎馬間歷二百餘戰數重創出血且數斛安得不病乎卒太宗詔有司琢石為人馬立墓前以旌戰功 圖形凌煙閣 高宗遣使致祭名臣者七人叔寶與焉皆終始著名者也

宋朝秦觀字少游揚州高郵人也舉進士不中元祐初

蘓軾以賢良方正薦于朝除太學博士校正祕書省  
書籍遷正字兼國史院編修官紹聖初坐黨籍通判  
杭州以御史劉極論其增損實錄責監處州酒稅又  
編置橫雷二州後放還至藤州而卒年五十三有文  
集四十卷觀長於議論文麗而思深蘓軾嘗以其詩  
薦之于王安石安石荅軾書云公竒秦君口之而不  
置我得其詩手之而不釋餘卷正眊眩未暇細讀嘗  
鼎一鑿旨可知也及觀死軾聞之歎曰少游不幸死



於道路哀哉哀哉世豈復有斯人乎 弟覲字少章  
亦能文

申 二百三十三

姓纂姜姓炎帝四嶽之後封於申號申伯周宣王母  
舅也晉有申書魯有申豐鄭有申侯楚有申叔時申  
公巫臣申包胥申亥韓有申不害著書

毛詩崧高天下復平能建國親諸侯褒賞申伯焉 維  
嶽降神生甫及申 丕顯申伯文武是憲 申伯之

德柔惠且直

左傳桓公六年太子同生公問名於申繻對曰名有五有信有義有象有假有類取於父為類公曰是其生

也與吾同物命之曰同

申繻魯大夫

昭公十一年王問申無宇曰弃疾在蔡何如對曰擇子

莫如父擇臣莫如君

申無宇楚人

成公十五年楚將北師子反曰敵利則進何盟之有申叔時老矣聞之曰信以守禮禮以庇身信禮之亡欲

免得乎

申叔時  
楚人

定公四年伍員與申包胥友其亡也謂申包胥曰我必  
復楚國包胥曰子能復之我必能興之 五年申包

胥曰吾為君也非為身君既定矣又何求

定公十二年費人襲魯仲尼命申句須伐之費人北國  
人追之敗諸姑蔑

申包胥楚大夫昭王在隨包胥如秦乞師秦伯曰子姑  
就館將圖而告包胥乃依庭牆而哭日夜不絕聲

秦伯為之賦無衣九頌首而坐秦師乃出越王問包胥戰奚以而可新序吳敗楚兵申包胥不受命而赴秦乞師秦救楚大敗吳師昭王復國而賞包胥包胥曰功成受賞是賣勇也遂逃賞

新序楚恭王曰申公巫臣為先王謀則忠自為謀則不忠是厚於先王而自薄也

申豐魯季氏屬大夫季武子問甯可禦對曰聖人在上無甯

史記申不害荆人也韓昭侯用為相終申子之身國治  
兵彊無侵韓者學本黃老而主刑名著書二篇號曰  
申子

儒林申公魯人也弟子自遠方至受業者百餘人申公  
獨以詩經為訓武帝使使東帛加璧安車駟馬迎申  
公至見天子問治亂之事時已八十餘對曰為治者  
不至多言顧力行何如耳乃以為太中大夫

南史循吏申恬字公休歷下邳北海二郡太守所至皆

有政績 為太山威惠兼著吏人便之

北史申徽字世儀拜假節瓜州刺史 進右僕射 為

襄州刺史性廉慎乃畫楊震像於寢室以自戒

新二百三十四

晉大夫新稚穆子之後見國語

郇二百三十五

周文王第十七子郇侯之後後漢郇恁為諫議大夫今

或音環

春

二百三十六

風俗通云楚相黃歇春申君子孫

頻

二百三十七

風俗通云漢有酒泉太守頻暢

仁

二百三十八

姓苑云彭城人

邠

二百三十九

姓苑云周太王居邠因氏焉

幽

二百四十

見姓苑

因

二百四十一

左傳遂人四族有因氏

鈞

二百四十二

風俗通楚大夫元鈞之後漢有御史鈞喜

倫

二百四十三

風俗通云黃帝時樂人伶倫氏之後今密州多此姓監



察御史玄慶京兆人

綸二百四十四

魏志云公孫文懿臣有綸直

神二百四十五

風俗通神農氏之後漢有騎都尉神曜 瑯琊姓苑云

今瑯琊有神氏

鱗二百四十六

左傳宋大夫鱗朱鱗曜

閼 二百四十七


姓苑廣平人

緡 二百四十八

見姓苑

莘 二百四十九

夏后啓支子封莘因氏焉音轉為莘



名賢氏族言行類稿卷十一

# 欽定四庫全書

子部

名賢氏族言行類稿卷十二

三

詳校官典籍臣潘奕雋

主事臣祁韻士覆勘

總校官進士臣朱 銓

校對官主事臣馮 培

謄錄監生臣徐鳳翔

欽定四庫全書

名賢氏族言行類稿卷十二

宋章定撰

荀二百五十

姓纂周文王第十七子邠侯之後以國為氏後去邑  
為荀晉有荀林父生庚裔孫況也

左傳僖公二年晉荀息請以屈產之乘垂棘之璧假道  
於虞以伐虢

僖公二十八年晉侯作三行以禦狄荀林父將中行  
說苑荀林父之事君進思盡忠退思補過是社稷之

衛也

襄公十八年荀偃士勾以中軍克京茲

成公三年晉作六軍荀驩為卿賞寧之功也 晉使

荀庚來聘丙午及荀庚盟

成公十八年晉悼公即位使荀家荀會為公族大夫使  
訓卿之子弟共儉孝弟

史記荀卿趙人年五十始來游學於齊齊襄王時卿最  
為老師三為祭酒 適楚為蘭陵令 李斯嘗為弟  
子已而相秦 推儒墨道德之行事興懷序列著數  
萬言

荀彘太原光武人元封三年為左將軍

後漢荀淑字季和潁川人少博學有高行名賢皆宗師  
之補朗陵侯相泣事明理稱為神君頃之棄官歸閒  
居養志產業每增輒以贍宗族知友 有子八人儉

緄靖燾汪爽肅專並有稱名時人謂八龍改其里曰  
高陽里靖有至行不仕號玄行先生 爽字慈明十  
二通春秋論語潁川語曰荀氏八龍慈明無雙子悅  
或並知名 悅字仲豫十二能說春秋 遷秘書監  
為漢紀三十篇辭約事詳論辨多美

魏志荀或字文若舉孝廉拜守宮令曹操用為司馬操  
雖征伐在外軍國事皆與或籌焉 或雖貴重謙冲  
節儉祿賜散之宗族知舊家無餘財



荀攸字公達或之從子入為尚書曹操曰公達非常人也吾得與之計事天下當何憂以為軍師魏國初建為尚書令深密有知防常謀謨帷幄人之師表前後凡畫奇策十二

晉書荀顗字景倩累遷侍中清純體道忠允立朝有佐命弼導之勲銘功太常配享清廟

荀勗字公曾為安陽令有遺愛生為立祠遷侍中後守尚書令勗久在中書專管機事及失之甚惆悵

悵悵或有賀之者勗曰奪我鳳凰池諸君賀我耶

子藩字大堅累遷尚書令二子邃闡 邃字道玄解  
音樂善談論拜侍中 闡字道明京都語曰洛中英  
英荀道明歷御史中丞侍中尚書

荀組字大章夷雅有才識 舊望清重忠勤顯著拜為  
司徒 子奕字玄欣補散騎常侍

荀崧字景猷志操清純雅好文學 拜尚書僕射定中  
興朝儀 朝野之望許以台司 二子斐羨 斐字

令遠有儀操風望起家為秘書郎遷尚書左丞 羨字  
令則清和有準 拜秘書丞 褚裒以為長史曰荀  
生資逸羣之氣將有冲天之舉 遷徐州刺史時年  
二十八中興方伯未有如羨之少者

南史荀伯子羨之孫為御史中丞 族弟昶字茂祖以  
文義至中書郎 昶子萬秋字元寶亦用才學自顯  
終於御史中丞

荀伯玉字弄璋仕齊高帝加前將軍忠勤盡心常衛左

右權動朝右每暫休外軒蓋填門 外論云千救萬  
令不如荀公一命

荀朗字深明少慷慨有將帥大畧後為合州刺史

孝義荀匠字文師居父憂四年不出廬戶郡縣以狀言  
擢為豫章王國左常侍

北史文苑荀濟字子通

文苑荀士遜為文清典見賞知音 在齊為中書舍人  
狀貌甚醜目曰醜舍人

辛二百五十一

姓纂似姓夏后啟別封支子於莘子孫去草為辛遂  
為辛氏左傳周太史辛甲辛俞美為昭王友秦有將  
軍辛騰家中山苦陘曾孫蒲漢有辛武賢

說苑晉逐樂盈之族命其家臣有敢從者死辛俞從之  
君曰命女無得從敢從何也辛俞對曰臣三世於樂  
氏受其賜多矣敢畏死而忘三世之恩哉晉君釋之  
前漢辛慶忌字子真破羌將軍辛武賢之子後拜為將

軍

武賢父子虎臣之俊

叙傳

漢成帝將立趙飛燕

為皇后怒劉輔直諫囚之掖廷獄左將軍辛慶忌等

上書救輔遂得減死朱雲請斬張禹上怒將殺之慶

忌免冠解印綬叩頭殿下曰此臣素著狂直臣敢以

死爭叩頭流血上意解然後得已慶忌此兩事可與

汲黯王章同科班史不書於本傳但言其為國虎臣

匈奴西域敬其威信而已方爭朱雲時公卿在前曾

無一人助之以請為可羞也

見容齋隨筆

魏志辛毗字佐治遷侍中諫文帝徙民實河南帝不  
答起入內毗隨而引其裾時中書監劉放令孫資  
見信於主其子敞勸其附之毗正色曰吾之立身自  
有本末就與孫劉不平不過令吾不作王公而已何  
危害之有監司馬懿軍仗節立軍門

晉書忠義辛勉字伯力劉聰將署為光祿大夫固辭曰  
大丈夫豈以數年之命而虧高節事二姓哉聰嘉其  
真節為築室於平陽西山

辛恭靖為河南太守為姚興所執恭靖厲色曰我寧為  
國家鬼不為羌賊臣

隱逸辛謚字叔重父怡幽州刺史世稱冠族 謚博學  
善屬文恬靜不妄交游累徵不起

羊耽妻辛氏字憲英聰朗有才鑒 羊祜嘗送錦被憲  
英嫌其華反而覆之其儉約如此

南史隱逸辛普明字文達居會稽會稽士子高其行  
徵辟不就



北史辛紹先明敏有識量仕魏為下邳太守 鳳達耽

道樂古有長者之名 子祥字萬福舉秀才遷司空

主簿 弟少雍字季和性仁厚有禮義門內之法為

時所重 遷田曹參軍 閨門禮讓人無間言

辛穉字叔宗舉茂才雍州別駕 歷荊州長史帶義陽

太守雅有恤人之志 子馥字元穎早有學行遷平

原相吏人懷安之

辛雄字世賓清河王懌辟為左曹後兼吏部尚書

辛琛字僧貴初為滎陽郡丞後為南梁太守當官奉法  
所在有稱 子術字懷哲為清河太守政有能名  
遷吏部尚書取士以才以器循名責實管庫必擢門  
閥不遺前後銓衡在術最為折衷 臨軍以威嚴牧  
人有惠政又為淮南經略使

辛德源字孝基劉逖薦之云枕藉六經漁獵百氏除散  
騎侍郎 隋初不得調隱林慮山著幽居賦以自寄  
辛威仕周為鄜州刺史時望既重朝廷以桑梓榮之

辛慶之字餘慶少以文學對策第一除秘書郎風度

為當時所重卒於秘書監族子昂字進君為龍州

長史威惠洽著吏人畏而愛之行成都令謂諸生

曰子孝臣忠師嚴友信立身之要諸生感悟歸告父

老曰辛君教誡如此不可違之井邑肅然咸從其化

儒林辛彥之不交非類博涉經史周文引為禮曹修定

儀注仕隋除太常少卿

循吏辛公義隋時除岷州刺史合境呼為慈母遷井

州刺史下車先至獄中驗問十餘日間決斷咸盡

唐辛替否字協時京兆人為左拾遺時置公主府官屬而安樂府補授尤濫築第侈費盛興佛寺替否上疏諫之遷殿中侍御史雍令劉少徵恃權貪贓替否按之岑義屢為請替否曰我為憲司懼勢以縱罪謂王法何

辛雲京蘭州人有膽決以擒生斬馘常冠軍積功授開府儀同三司授太原尹治謹於法下有犯雖絲毫皆

不肯貸賞功亦如之軍中畏而信回紇恃舊勲每入朝所在暴鈔至太原以戎狄待之虜畏不敢惕息數年太原大治加右僕射同平章事從弟京杲從李光弼戰有力肅宗異之召見曰黥彭闢張之流乎

辛讜居揚州年五十不肯仕而慨然常有濟時意龐勛反攻杜慆於泗州讜聞之拏舟趨泗口貫賊柵以入時賊張甚衆皆南走獨讜北行冒白刃入危城屢出救援慆亦出兵表裏擊賊大敗讜入人心遂固復出見

淮南令狐絢浙西杜審權合救兵五千鹽粟鉅萬淮  
路梗不得進讜與決戰斬賊六百級乃克入城圍凡  
十月乃解卒全一州 後終嶺南節度使

宋朝辛仲甫字之翰汾州孝義人也初從郭崇辟掌書  
記入拜右補闕知光州移彭州課種柳蔭行路郡人  
謂之補闕柳 太祖問趙普羣臣文武兼資者普以  
仲甫對太平興國初遷起居舍人奉使契丹契丹主  
問黨進何如人仲甫曰國家異人間出黨進何足道

哉契丹主欲留之仲甫曰信以成命義不可留有死而已契丹主竟不能屈使還知開封府拜御史中丞

雍熙三年除參知政事出知陳州 卒謚康節

賓 二百五十二

姓纂左傳齊大夫賓須無周賓起為王子朝傅

樂記賓牟賈侍坐於孔子孔子與之言及樂子曰惟丘之聞諸萇弘亦若吾子之言是也

甄 二百五十三

姓纂虞舜陶甄河濱因以為氏或音堅漢末太保甄  
邯生豐司徒為中山著姓也中山無極邯六代孫逸  
後漢上蔡令女為魏文帝皇后生明帝後追封安城  
侯子嚴孫暢生術六代孫玄成梁吏部尚書生詡詡  
曾孫懷素唐廬陵令

後漢儒林甄字字長文教授常數百人建武中徵拜博  
士傳業子普普傳子承諸儒以承三世傳業莫不歸  
服之舉孝廉卒於梁相子孫傳學不絕



南史循吏甄法崇父匡位少府卿以清聞法崇宋初為  
江陵令 孫彬有行業鄉黨稱善嘗以亭就人質錢  
後贖亭於東中得五兩金即送還之 後為益州錄  
事叅軍帶郾縣令將行同列五人梁武誠以廉慎至  
彬獨曰卿昔有還金之美故不復以此言相屬  
孝義甄恬字彥約母喪廬墓側有白鳩白雀棲宿其廬  
州表其行狀

北史甄琛字思伯學覽經史稱有刀筆宣武時領中尉

俯首畏避不能糾繩貴游所劾多下吏後除定州刺史

甄玄成字敬平隨梁訥鎮襄陽轉記室參軍

唐甄濟字孟成定州人好學以文雅稱居青巖山十餘年遠近伏其仁不敢畋漁諸府五辟詔十至堅卧不起安祿山求濟授范陽掌書記察祿山有反謀辭歸廬祿山使蔡希德封刀召之曰即不起斷其頭持刀趨前濟引頸待之希德歎息以實病告

甄逢濟子幼而孤及長耕宜城野力讀書不謁州縣歲  
饑節用以給親里以義聞常以父名不得在國史  
欲詣京師自言元和中表滋表濟節行與權皋同科  
宜載國史有詔贈濟祕書少監移書於史館逢與其  
父俱當得書由是父子俱顯名

甄權許州人以母病與弟立言究習方書遂為高醫

真 二百五十四

風俗通漢有太尉長史真祐

建安真德秀字景元 浦城人 已未曾榜登第中博

學宏詞科召試入館本姓慎避國諱為真今附於此

文 二百五十五

風俗通周文王支孫以謚為姓

前漢循吏文翁廬江舒人為蜀郡守 脩起學宮蜀地

大化吏民為立祠堂

魏志文聘字仲業太祖曰卿真忠臣也 為江夏太守

有威恩名震敵國賊不敢侵 遷後將軍封新野侯

晉儒林文立字廣休拜濟陰太守入為太子中庶子

忠貞清實有思理器幹前在濟陰政事修明後事東  
宮盡輔導之節

南史孝義文獻叔八世同居詔表門閭蠲租稅

北史文門愛早孤養伯父母以孝聞及居喪哀毀骨立  
鄉人相與標其孝義

宋朝文彥博字寬夫汾州介休人也少舉進士為大理  
評事知翼城榆次二縣改太常博士通判兗州入為

監察御史遷殿中侍御史以戶部員外郎直史館為河東轉運使麟府二州皆在河外因山為城最險固始彥博父泊為轉運使以餉道回遠軍食不足乃按唐張說嘗領并州兵萬人出合河關掩擊黨項於銀城北為河外直道自折德扆世有府谷即大河通保德以便府人故河關路廢而弗治將奏復之未及而卒彥博領漕事遂通銀城而州有積粟可守元昊圍麟州知城中有備解圍而去未幾遷天章閣待制為

都轉運使元昊復寇邊以彥博為龍圖閣直學士知  
秦州守邊二年有威名虜不敢犯改樞密直學士知  
益州以右諫議大夫樞密副使召還改參知政事  
貝州宣毅十將王則挾妖術與州校張巒卜吉謀反  
改年號置官屬河北諸路遣兵傳城下命明鎬為安  
撫使師久未克彥博請行改命為宣撫使以鎬副之  
至則督將攻城旬餘未下諜言賊欲潛兵出邀虜使  
輜重鎬先遣殿侍袁安設伏敗之軍士有請穴地以

入貝州官軍即城南為穴因自攻其北以牽制之彥  
博募死士二百銜枚由穴進生擒則檻送京師拜禮  
部侍郎同中書門下平章事集賢殿大學士彥博因  
進對言嘗聞德音以搢紳多務奔競非裁抑之無以  
厚風俗若恬退守道者稍加旌擢則奔競躁求者庶  
幾知恥乃薦王安石韓維張瓌悉被甄擢罷相以  
吏部尚書觀文殿大學士知許州徙青州又徙秦州  
尋拜中武軍節度使知永興軍至和二年再入為吏



部尚書同中書門下平章事昭文館大學士與富弼  
同拜宣麻之日仁宗遣小黃門覘於庭士大夫皆以  
得人相慶而天下謂之文富 嘉祐三年以河陽三  
城節度使同平章事判河南府封潞國公改鎮保平  
判大名府又改鎮成德遷尚書左僕射判太原府俄  
復鎮保平判河南丁母憂英宗即位起復成德軍節  
度使乞終喪許之初仁宗之不豫也彥博與富弼乞  
立儲嗣仁宗許焉而後宮將有就館者故其事緩已

而彥博去位其後弼亦以憂去彥博既復闕復以故  
官判河南有詔入覲英宗曰朕之立相公之力也彥  
博竦然對曰陛下入繼大統乃先帝聖意與皇太后  
叶贊之力人臣何力之有兼陛下登儲纂極之時臣  
方在外皆韓琦等承聖志受顧命臣無與焉英宗曰  
備聞始議相公於朕有恩彥博避遜不敢當英宗曰  
暫煩西行即召還矣尋除侍中徙鎮淮南判永興軍  
入為樞密使劍南西川節度使 熙寧六年除司空

河東節度使判河陽徙判大名府初選人李公義請  
為鐵龍爪以濬河宦者黃懷信更作濬川杷天下指  
笑以為兒戲王安石獨信之除范子淵都水監丞置  
濬川司行其法子淵奏功言䟽道水勢西歸故道退  
出民田數萬頃朝廷疑其妄事下大名彥博曰河水  
汗漫非杷可濬雖甚愚之人皆知無益去年退地止  
因霜降水落今年未嘗用杷而退地更多臣不敢雷  
同欺罔九年除太保力辭元豐三年除太尉開府

儀同三司復判河南王堯臣子同老言仁宗不豫先  
臣與文彥博劉沆富弼等請立英宗皇帝為嗣仁宗  
感悟開納於是手詔中書曰文彥博蓄德深厚善不  
自伐懷此大功絕口不言中外搢紳莫有知者乃知  
援立之功厥有攸在嘉祐之詔但宣之耳其議所以  
褒顯之遂加彥博河東永興節度使彥博力辭兩鎮  
宴餞瓊林輔臣皆與兩遣中謁者遺詩以寵其行有  
報在不言功之語當世榮之彥博至河南未交印先

就第廟坐以見監司既交府事見監司府官如常式  
或以問彥博彥博曰吾未視府事三公見庶僚也既  
交印河南尹見監司矣六年請老拜太師致仕元祐  
初司馬光拜相起彥博為平章軍國重事六日一朝  
一月兩赴經筵邊事河防及朝廷大政令即與輔臣  
共議恩遇甚渥期年乃求去詔曰昔西伯善養老而  
太公自至魯穆公無人子思之側則長老去之公自  
為謀則善矣獨不為朝廷惜乎又曰唐太宗以干戈

之事尚能起李靖於既老而穆宗文宗以燕安之際  
不能用裴度於未病治亂之效於斯可見彥博讀詔  
聳然不敢言去蓋復留四年彥博請去不已復以太  
師河東節度使開府儀同三司致仕崇寧中與元祐  
黨後命出籍追復太師謚曰忠烈彥博凝簡莊重有  
大臣體位將相者五十餘年徧歷公孤兩以太師致  
仕雖位貌隆貴而平居接物謙抑尊德樂善如恐不  
及邵雍程顥程頤以道學名世居洛陽而彥博與之

遊元豐中與富弼及當時老成而有賢德者十一人  
用白居易故事就弼第置酒相樂尚齒不尚官已而  
圖形妙覺僧舍謂之洛陽耆英會司馬光為文序其  
事王拱辰守北都以書來諗曰拱辰亦家洛位與年  
不居數客後顧以官守不得執卮酒在坐席願預名  
其間幸無我遺其為時所嘉羨如此彥博八子皆歷  
要官第六子及甫

及甫字周翰初為大理評事遷直史館 遷吏部員外

郎除直龍圖閣知同州父太師彥博起為平章軍國  
重事除及甫右司員外郎以嫌改光祿少卿 彥博  
致仕以集撰知河陽名為工侍 後坐元祐黨褫職  
居久之最後復集撰以卒

文同字與可梓州梓潼人也舉進士稍遷太常博士集  
賢校理知陵州洋州最後知湖州同以文學知名操  
韻高潔畫筆尤妙 同既死蘇軾以文哭之曰孰能  
敦德秉義如與可之和而正乎孰能養民厚俗如與



可之寬而明乎孰能為詩與楚詞如與可之婉而清  
乎孰能齊寵辱得喪如與可之安而輕乎 曾慥云  
與可下世潁濱作祭文云世在熙寧士銳而翺利誘  
於旁奔走傾旋公居其間澹乎忘言二蘇稱許如此  
不問可知

殷二百五十六

姓纂殷姓成湯國號也二十二代四十四王六百二  
十九年為周所滅子孫以國為姓

晉殷浩字深源弱冠有美名為風流談論者所宗王  
濛謝尚伺其出處以卜江左興亡曰深源不起當如  
蒼生何後都督諸軍以敗績被黜終日書空作咄  
咄怪事四字而已後桓溫將以為尚書令浩欣然  
將答書慮有謬誤開閉者數十竟達空函

殷仲堪能清言善屬文武帝召為太子中庶子甚相親  
愛後出鎮江陵將之任詔曰卿去有日使人酸然常  
謂永為廊廟之寶而忽為荆楚之珍

殷觀字伯通性通率有才器為南蠻校尉在職清明政績肅舉

南史殷景仁曾祖融晉太常景仁少有大成之量宋文帝時與王華等四人並為侍中以風力局幹冠冕一時同升之美近代莫及後遷尚書僕射雖卧疾朝政大小必以問馬子道矜道矜子恒俱位尚書

殷淳字粹遠祖允晉太常父穆以和謹致稱仕宋位特

進淳少好學有美名歷黃門侍郎 淳弟冲字希遠  
位御史中丞有司直之稱 冲弟淡字夷遠歷黃門  
吏部郎以文章見知

殷孝祖曾祖羨晉光祿勳孝祖少有立功之志長以氣  
節成名宋明帝時進號冠軍將軍

殷琰字敬珉孝祖族子少以名行見稱為少府加給事  
中

殷鈞字季和為臨川內史閉閣卧理而百姓化其德劫

盜皆奔出境 卒國子祭酒

殷芸字灌蔬博洽羣書

孝義殷不害字長卿居父憂過禮事老母勤劇無所不  
至士大夫以篤行稱之 仕梁為廷尉平長於政事  
兼飾以儒術名法有輕重不便者輒上書言之 弟  
不佞字季卿少立名節尤長吏術為武康令

唐殷侑陳州人幼有志於學通經術以講道為娛貞元  
末及五經第其學長於禮擢太常博士 元和八年

使回鶻不為之屈 進諫議大夫侑論朝廷治亂得  
失前後凡八十四通 拜義昌軍節度使為營田戶  
口滋饒上下便安請立石紀政徙天平節度 開成  
元年為刑部尚書言朝廷宜任耆德毋輕用新進帝  
善之 侑以經術進臨事銳敏有強直名

殷踐猷字伯起尤通氏族歷數醫方賀知章嘗號為伍  
總龜千年五聚問無不知也舉文儒異等科授祕書  
省學士 孫亮事祖母蕭侍疾不脫衣者數年有白

鷺巢楣

殷開山名嶠涉書工為尺牘高祖起關輔盜興開山招  
慰皆下 從秦王討薛舉從平仁果復討王世充以  
功進爵鄖國公

云 二百五十七

風俗通祝融之後 河南官氏志牒云氏改為云氏  
前漢云敬字幼孺平陵人師事吳章及王莽斬章禁錮  
弟子不得仕宦門人盡更名他師敬時為大司徒掾

自勅吳章弟子收章葬之京師稱焉將軍王舜高其志節比之欒布薦為中郎諫大夫

雲 二百五十八

姓纂縉雲氏之後 河南後魏書官氏志宥連氏改為雲氏

北史雲定興善製器仗 在隋擢少府丞累遷屯衛大將軍

云 二百五十九



祝融之後封於羅號妘子見國語

邲 二百六十

妘子國或作邲

芸 二百六十一

風俗通晉大夫芸質見戰國策

薰 二百六十二

姓苑云人姓

軍 二百六十三

冠軍侯之後因以為姓

筋 二百六十四

姓苑云人姓

名賢氏族言行類稿卷十二